

In Memoriam

Recordando Charles “Charlie” Lampe, un Arubiano excepcional

Skirbi pa Clyde Harms

Diasabra, dia cu e lo a cumpli 78 aña, despues di un servicio funebre na Logia El Sol Naciente y un ceremonia religioso na misa San Francisco, e rumannan masonico di Charlie Lampe lo entreg’e na e Gran Architecto di Universo den e santana Acacia cu oracion pa e gosa di paz eterno. Esaki lo clausura e bida di un Arubiano excepcional cu a dedica un parti grandi di su bida na yuda su prohimo.

Charlie su curriculum social ta envidiabel. Como miembro di Lions Club di Aruba, Charlie pa casi trinta aña a maneha e programa di “wheelchair”. Tambe el a sirbi e club civico den varios otro funcion pa cual el a haya hopi reconocemento. Pa e manera excepcional cu Charlie a ehecuta tur su responsabilidadnan y su devocion na yuda otro, na aña 2004 Lions Club International a honre cu e Melvin Jones Fellow Award, e honor mas halto cu un Lion por ricibi. Como miembro di Lodge El Sol Naciente, Charlie a sirbi como maestro di bankete pa mas di trinta aña. Reconociendo e desempeño eficaz di su responsabilidadnan y su comportacion como un Mason ehemplar, Charlie su rumannan di El Sol Naciente a nombr’e miembro honorario na aña 1994. Pa su hopi aña di trabounan boluntario na bienestar di nos comunidad, Charlie a ricibi condecoracion real como Lid in de Orde van Oranje Nassau na aña 2009.

Na aña 1990 Charlie a haya sa cu Hospital Horacio Oduber tabatin un machin Xray bieu ta frustia den un warehouse. Pensando riba algun amigo medico den un pueblo na Merida, el a convence gerencia di hospital pa regala e ekipo na e pueblo. Hopi gradicido, Gobernador Jesús Rondón- Nuceta a presenta un diploma di merito na Charlie na Mey,

1990. Charlie tabata empleado den Accounting Department di Lago pa 33 aña. Ami tabatin e placer di ta su colega pa ocho aña. Na 1980 Charlie y su señora Elsa a tuma over e restaurant Antonio’s y despues cu Charlie a laga

Lago na 1985, el a maneha e negoshi full time te 1988. Algun aña despues Charlie a maneha e tienda Bida den Hendrikstraat.

Charlie ta laga atras su señora di mas di mey siglo Elsa Lampe-Saladin, su yiunan Mimi y Chimbo, Maki

y Judith, Lissy y Rudy; su nietonan Darcy y Gilenne, Aissette, Ghislain, Charlito; su bisanietonan Michael Shawn y Antron; su ruman Sophia y Leo Leonardo; su swanan Maximo Saladin y famia, Edwin Saladin y famia. Tambe Charlie ta laga atras su fellow Lions

y Lionesses, su rumannan Masonico di El Sol Naciente y otro Logianan Masonico na Aruba y un cantidad grandi di amigo cu semper a stima Charlie pa su comportamiento cariñoso. Cu nos señor duna paz eterno na Charlie Lampe, un Arubiano excepcional. □